



Tužilaštvo - Tužiteljstvo Bosne i Hercegovine  
Тужилаштво Босне и Херцеговине

Broj: T20 0 KTRZ 0027769 25;  
Sarajevo, 29. decembra 2025. godine

**SUD BOSNE I HERCEGOVINE**  
**- Sudiji za prethodno saslušanje -**

Na osnovu člana 35. stav 2. tačka i), člana 226. stav 1. i člana 227. Zakona o krivičnom postupku Bosne i Hercegovine (ZKP BiH), p o d i ž e m:

**OPTUŽNICU**

**Protiv:**

1. **SIMANIĆ ZORAN**, zvani „Zajdo“, rođen 1972. godine u Loznici, Republika Srbija; "[...]"
2. **DRAGAN JOVIĆ**, zvani „Mujo“, 1959. godine u Ročeviću, općina Zvornik, Bosna i Hercegovina; "[...]"

**Zbog osnovane sumnje da su:**

Za vrijeme široko rasprostranjenog i sistematičnog napada preduzetog u periodu od 06.07.1995. do 01.11.1995. godine od strane pripadnika VRS-a i MUP-a RS, usmjerenog na pripadnike bošnjačkog naroda u zaštićenoj zoni UN-a Srebrenica,

*tokom kojeg napada je izvedena operacija trajnog i prisilnog preseljenja cjelokupnog bošnjačkog civilnog stanovništva, operacija hvatanja, zatvaranja, i pogubljenja vojno sposobnih muškaraca Bošnjaka i dječaka iz Srebreničke enklave, te operacija njihovog ukopa, iskopa, te ponovnog ukopa na drugim lokacijama u cilju sakrivanja dokaza, na koji način je djelomično istrijebljena skupina bošnjačkog naroda pri čemu je cjelokupno bošnjačko civilno stanovništvo, do 40 000 civila Bošnjaka uklonjeno iz srebreničke enklave, a više od 7000 muškaraca Bošnjaka i dječaka ubijeno, zakopano, otkopano i premješteno na druge lokacije pa ponovo zakopano, osumnjičeni svjesno pružili pomoć članovima udruženog zločinačkog poduhvata (UZP) između ostalih, generalu "(...)" komandantu Glavnog Štaba VRS, pukovniku "(...)", načelniku za bezbjednost Glavnog štaba VRS-a, potpukovniku "(...)", pomoćniku komandanta za bezbjednost Drinskog korpusa, pukovniku "(...)", komandantu Zvorničke brigade, potpukovniku "(...)", zamjeniku komandanta i načelniku štaba Zvorničke brigade, poručniku "(...)", pomoćniku komandanta za bezbjednost Zvorničke brigade, "(...)" pomoćniku komandanta za bezbjednost i obavještajne poslove Bratunačke brigade, "(...)" načelniku inženjerije Zvorničke brigade, "(...)" komandantu 2. bataljona Zvorničke brigade VRS-a, te raznim drugim pojedincima, vojnim i policijskim jedinicama, uključujući jedinice Drinskog korpusa, jedinice Glavnog štaba VRS, jedinice MUP-a RS, a čiji plan i cilj je bio da zatvore i po kratkom postupku pogube, a potom i zakopaju vojno sposobne muškarce Bošnjake iz Srebreničke enklave, a žene, djecu i starce da prisilno premjeste iz enklave, i na taj način ih unište kao grupu, tako što su:*

*nakon što je što je ne manje od 829 (osamstotinadvestdevet) zatočenika iz Zaštićene zone Ujedinjenih nacija "Srebrenica", muškaraca i dječaka Bošnjačke nacionalnosti, dana 14. jula 1995. godine, sa područja općine Bratunac, organizovano autobusima i kamionima prisilno dovedeno u osnovnu školu u naselju Ročević, općina Zvornik, u kojem transportu su učestvovali i pripadnici Vojne policije Bratunačke brigade VRS-a uključujući osumnjičenog "(...)" gdje su ih naoružani automatskim vatrenim oružjem obezbjeđivali pripadnici vojne policije Zvorničke i Bratunačke*

brigade, kao i pripadnici 2. bataljona Zvorničke brigade VRS-a, na način da su se rasporedili oko škole i navedenim oružjem ciljali u vrata i prozore zgrade škole i fiskulturne sale u kojoj su bili zatočenici, a ispred koje se nalazio oteți transporter UN-a u kojem su sa teškim naoružanjem bili pripadnici Vojne policije Bratunačke brigade, u kojoj školi su zarobljenici držani u nehumanim uslovima bez vode i hrane, kao i u stalnoj atmosferi straha za vlastiti život, te je nekoliko zarobljenika dana 14. jula 1995. godine ubijeno vatrenim oružjem u neposrednoj blizini navedene škole u Roćeviću, kojem prilikom je slučajno i ranjena mještanka sela Roćević "...", pa je dana 15. jula 1995. godine nakon što je stigao pred navedenu osnovnu školu u mjestu Roćević, (...) pripadnik vojne policije Zvorničke brigade VRS-a, izlazeći iz auta prijeto zarobljenicima riječima "pobili ste naše u Kravici jebat ću vam majku" pritom držeći u ruci hladno oružje većih dimenzija, "sablju" ili "mačetu", da bi zatim ispred škole osumnjičeni (...) na naročito brutalan način navedenim hladnim oružjem lišio života nekoliko zatočenika, čija tijela su ostala u krugu školskog dvorišta, a istog dana "...", "...", "...", (...) i **Dragan Jović** zajedno sa drugim njima poznatim licima učestvovali u organizovanom premještaju zatočenika iz navedene škole u kamione koji su jedan po jedan dolazili pred navedenu školu, zatim prevozu kamionima i obezbjeđenju navedenih zarobljenika do lokaliteta šljunkare na obali Drine, naselje Kozluk, općina Zvornik, zvani "Kozlučki navoz", gdje je ovim zarobljenicima naređivano da iskaču sa kamiona u rupu u zemlji većih dimenzija koja je nastala od vađenja šljunka na navedenoj lokaciji, a oko navedenih rupa porēdani u polukrug bilo je raspoređeno oko 30 (trideset) pripadnika Zvorničke brigade, Bratunačke brigade, Podrinjskog odreda specijalnih snaga "Vukovi sa Drine" VRS-a, te naoružanih civila, među kojima i "...", "...", "...", (...) i **Zoran Simanić** i **Dragan Jović** pa su pucajući iz vatrene oružja učestvovali u lišenju života navedenih zarobljenika, a kamioni su dolazili i odlazili jedan po jedan do navedene lokacije iz škole u Roćeviću tokom cijelog dana, te je navedenu lokaciju tokom dana dovožena municija, hrana i piće za osobe koje su učestvovala u pogubljenjima, a na kojoj lokaciji je do kraja dana 15. jula 1995. godine **lišeno života ne manje od 829 (osamstotinadvadesetdevet) osoba**, čiji posmrtni ostatci su naknadno zatrpani u masovne grobnice na navedenom lokalitetu, a nakon čega su njihovi posmrtni ostatci premješteni u više sekundarnih masovnih grobnica.

**Dakle, Dragan Jović i Simanić Zoran** znajući za namjeru glavnih izvršilaca da istrijebe nacionalnu i vjersku skupinu Bošnjaka, pomagali i podržavali organizirano ubijanje muških pripadnika skupine Bošnjaka, koji su, kao Bošnjaci Istočne Bosne, činili značajni broj etničke skupine Bošnjaka;

*Čime bi učinili krivično djelo Genocid iz člana 171. tačka a) i b), Krivičnog zakona Bosne i Hercegovine (KZBiH) u vezi sa članom 180. stav 1., i u vezi sa članom 31. KZ BiH.*

**TUŽITELJ  
TUŽILAŠTVA-TUŽITELJSTVA BIH**